



# Veitokani ena Chess

*Era na qito vakacava kevaka era sega ni veikilai vakavinaka?*

**Mai vei Olivia Kitterman**  
(Yavutaki e na italanoa dina)

*A yaco na italanoa oqo mai Jamani.*

"Rarama na yaloqu ga!"\* A lagata o Matvii. E rau a lagasere vata kei koya o tinana kei ganena, o Tymofii. Sa buto sara ena tautuba ni katuba ni motoka. Ia na sere e a vukea me ramase cake vakalailai na veika kecega.

Oqo e dua na gauna vakarerevaki vei Matvii kei na nona matavuvale. E ratou sa toki i Jamani baleta ni sa sega ni taqomaki vinaka na nodratou vale. E rauta ni rua na siga na nodratou lako voli, oqo e ratou sa voleka sara ni yaco. E dua na bisopi eke e Jamani a draivataki ratou tiko ki na dua na vanua me ratou tiko kina.

A marau o Matvii ni a vukei ratou na Tamada Vakalomalagi me ratou yaco bula ki Jamani. Ia a vakananumi Tamana sara vakalevu. A tiko ga yani e nodratou vanua ena vuku ni dua na ivalu. E lomaleqataki koya vakalevu o Matvii.

A vakelea na motoka o bisopi ena tautuba ni dua na vale. "Dou sa kidavaki mai ki na noqu vale."

A dreta na nona kato o Matvii ka muria na nona matavuvale ki loma. E a vakadigagalu na vanua. E ratou sa moce beka na matavuvale nei Bisopi.

"E rawa ni dou tiko ena rumu nei Mats kei Lore ni dou tiko voli eke," a kaya o bisopi.

"Wawa," a kaya o Na. "Me rau kakua ni vakalala na nodrau rumu me baleti keitou."

A matadredredre o bisopi. "E ka ni marau vei rau. Keitou vinakata ga mo dou yalo vakacegu."

A deguvacu o Na. "Vinaka vakalevu."

Ena matakalailai ka tarava, e rau a gole ki valenikuro o Matvii kei Tymofii me rau katalau. A dabe toka ena teveli o bisopi kei na dua na gonetaganene kei na goneyalewa lailai. E rau sega sotii ni rairai qase cake mai vei Matvii.

"Oqo o rau na luvequ o Mats kei Lore," a kaya o bisopi.

"Drau bula vinaka," e kaya o Tymofii.

E rau veilecayaki vakalailai o Mats kei Lore.

"E rau sega ni kila na nomudrau vosa," a kaya o bisopi. "Ia au kila ni dou na veitokani vinaka."

E veveku na matai Matvii. E rawa vakacava ni ratou veitokani kevaka e ratou sega ni rawa ni veitalanoa? A vakila ni vaka me sa yali na matanisiga a lagata voli ena bogi.

Ni rau kana oti, a vakaraitaka vei rau o Mats kei Lore e dua na rumu ni qito. E rau qitotaka tiko e so na ka ni vakatatalo e rua na gone sobu. A kila rawa o Matvii ni rau tacidrau gone sobu o Mats kei Lore.

A kaya o Mats e dua na ka. E rogorogo vaka e dua na taro, ia e sega ni kila o Matvii na ka e tukuna. A dabe sobu o Mats ka dolava e dua na pakete imau. A tuvai ira vaka binibini. Rau sa qai tomika cake o koya kei Lore na nodrau imau. A vinakata o Matvii me qito. Ia a sega ni kila na kena qitotaki.

A biuta sobu o Mats e dua na imau ka raici Matvii. A tukuna tale e dua na ka.

A vinakata o Matvii me tagi. E sega ni vinakata me vakaitikotiko e Jamani kevaka e sega ni kila na ka era tukuna.

A kaya o Lore e dua na ka vei Mats, qai cici yani ki na kovati. A lesu mai o koya ka mai tuva e dua na qito vou ena fuloa.

A kila o Matvii na qito oqo. Na veitiki ni kau e vaka na irairai ni kena ka tu mai vale. Na chess! A dau qito chess vata kei Ta me vica vata na auwa. A deguvacu ena marau o Matvii. E kila o koya na qitotaki ni kena oqo.

A matadredredre o Lore ka tekivu tuvanaka na veitikina.

A tosoya o Matvii na nona pawn ena rua na lomanibai ka sarava ni sa tosoya yani o Lore na nona sotia. E tokitaki bishop o Matvii vei ratou na Lore. E rau marau kei Tymofii. A kudru ena rarawa o Lore, ia a matadredredre.

E ratou a qito me dua na gauna balavu. Sega ni dede e ratou sa veidredrevaki. E ratou sega ni veikilai vosa, ia e ratou veimaraautaki ga.

Ena vica na macawa ka tarava, e ratou a kunea eso tale na qito e ratou kila taucoko. E ratou a qito veicaqe e tautuba kei ira eso tale na gone ni Jamani. A vulica talega o Matvii e vica na vosa vaka-Jamani. Ena so na gauna a cala o koya, ia a tovolea tikoga.

Ia a vakananumi tamana kei na nodratou itikotiko tikoga o Matvii. Ia a vakavinavinakataka ni vukei koya na Tamada Vakalomalagi me vakaitokani vou. ●



DRONI MAI VEI HANNAH LI